



Mahein nia Lian No. 30, 24 Febreiru 2012

**Sirkuntansia Ne'ebé FALINTIL-FDTL Bele Iha Papel Ba Eleisaun 2012 Iha Lidun
Seguransa tuir Lei Eleisaun nian**

Introdusaun

Iha kuadru nasional ne'ebé aplika ba eleisaun Prezidencia Repúblika no Parlamentu Nasionál nian iha sirkuntansia ne'ebé maka FALINTIL-Força Defesa Timor-Leste (F-FDTL) bele iha papel ba eleisaun 2012, iha Timor-Leste. Iha Fundasaun Mahein (FM) nia Lian Nú. 30, halo analiza konabá kuadru nasional sira ne'ebé fo mandatu ba F-FDTL nudar konstituisaun haruka, hare mos konabá misaun F-FDTL nian ne'ebé difini iha nia estatutu orgánika rasik. Nune'e mos halo analiza konabá papel F-FDTL nian iha eleisaun 2012 tuir kuadru nasional sira ne'ebé aplika iha Lei Eleisaun Prezidencia Repúblika no Parlamentu Nasionál inklui Regulamentu STAE 2011 konabá prezensa F-FDTL iha seguransa eleisaun nian no Planu Operasional Eleisaun Prezidencia Repúblika no Parlamentu Nasionál tinan 2012 ne'ebé konstitui mos kordenasaun F-FDTL iha operacional STAE nian.

Misaun F-FDTL tuir Kuadru Nasionál

Konstituisaun Repúblika Demokrátika Timor-Leste, Parte V Defeza no Seguransa Nasionál artigu 146 konabá Forsa Armada nian ne'ebé deskrebe Timor-Leste nia forsa armada, F-FDTL, komposta eksklusivamente ho sidadaun nasional, iha responsabilidade ba Repúblika Demokrátika Timor-Leste nia defeza militar no iha organizasaun ida deit iha territóriu nasional tomak. F-FDTL garante independénsia nasional, integridade territoriál no populasaun sira nia liberdade no seguransa hasoru agresau ka ameasa externa naran ida, ho respeito ba orden konstitusionál.¹

Dekretu-lei Nú. /2006 Loron Estatutu Orgániku F-FDTL Artigu 2 Misaun F-FDTL nian difini F-FDTL nia misaun jenérika maka atu garante independénsia nasional, integridade territoriál, liberdade ho seguransa populasaun nian kontra kualkér ameasa ka agresau husi liur, tuir orden konstitusionál.² Aléinde misaun jenérika ne'ebé refere iha número anteriór, F-FDTL kumpre mós misaun sira hanesan tuir mai: Garante vijilánsia ho defeza ba fronteira terrestre (rai-laran), marítima (tasi-laran) ho aérea; Garante atividade sira atu buka no halo salvasaun iha tasi-laran; Fó apoiu ba autoridade sivil, iha âmbito ba satisfasaun nesesidade bázika no mós atu hadi'a qualidade moris populasaun nian; Fó apoiu ba orden konstitusionál, iha âmbito ba partisipasaun iha situasaun deklarasaun Estadu de Sítiu nian ka Estadu de Emerjénsia; Fó apoiu ba populasaun sira, iha kazu katástrofe natural ka kalmalidade pública; Fó apoiu ba política

¹ Konstituisaun Repúblika Demokrátika Timor-Leste, Artigu 146, número 1 no 2

² Dekretu-lei Nú. /2006 Loron Estatutu Orgániku F-FDTL nian, Artigu 2 número 1

externa estadu nian, liu husi asaun Koperasaun Tékniku-Militár nian, partisipasaun iha Operasaun ba Apoiu ba Pás, Operasaun Humanitária no asaun sira seluk ne'ebé sei determinadu iha âmbito akordu internasionál sira nian.³ Misaun Espesífika F-FDTL nian no sira nia definisaun mosu husi apresentasaun projetu husi Xefe de Estadu-Maior Jenerál F-FDTL nian, ne'ebé submetidu iha forma proposta nian husi Ministru da Defeza sei hetan aprovasaun husi Konsellu Ministru.⁴

Nune'e konstitui mos iha Lei Seguransa Nasionál 02/2010 Kapitulu III Sistema Integradu Seguransa Nasionál, artigu 18) sistema integradu seguransa nasional, nune'e mos Seksaun V konabá empenamentu operacional nian iha artigu 34), 35) no 36). Inklui Lei Seguransa Interna 04/2010 Kapitulu II Politika Seguransa Interna no Kordenasaun ba hala'o ka ezekusaun, artigu 15) konabá knáar komplementar seguransa interna nian, iha alinea a) ne'ebé konstitui mos intervensaun Forsa Armada nian, maibe iha situasaun rasik. Signifika depende nesesidade ka sirkuntansia sira ne'ebé prezisa intervensaun forsa armada nian, nune'e bele fo responsabilidade luan ba F-FDTL nian intervensaun.

Papel F-FDTL nian iha Eleisaun 2012

1. Eleisaun Prezidencia Repúblika no Parlamentu Nasionál nian

Lei eleisaun Prezidencia Repúblika 07/2006 artigu 35, numeru 1) bandu prezensa elementu F-FDTL ezerse nia funsaun iha sentru votasaun no iha âmbito ida ne'e, iha deit elementu PNTL iha sentru votasaun maibe ezerse deit nia funsaun dook husi sentru votasaun ho distansia metru 25.⁵ Maibe la taka dalan ba elementu forsa seguransa nia intervensaun iha situasaun ruma, tuir regulamentu STAE nian.⁶

Nune'e mos Lei Eleitoral Parlamentu Nasionál nian 06/2006 aritugu 36 número 1) bandu prezensa elementu F-FDTL nian hodi ezerse nia funsaun iha sentru votasaun, iha âmbito ida ne'e mos iha deit elementu PNTL iha sentru votasaun maibe ezerse deit nia funsaun dook husi sentru votasaun ho distansia metru 25.⁷ Maibe la taka dalan mos ba forsa seguransa nia intervensaun iha situasaun ruma, tuir regulamentu STAE nian.⁸

Maske nune'e la taka dalan ba prezensa forsa seguransa iha sentru votasaun tuir Regulamentu 04/STAE/X/2011 konabá prosedementu ba votasaun, kontajen ba votu nian no apuramentu ba rezultadu eleisaun Prezidencia Repúblika no Parlamentu Nasionál nian. Nudar hakerek iha lei ne'e rasik iha artigu 16 ne'ebé hatete katak husu prezensa forsa manutensaun orden públika

³ Dekretu-lei Nú. /2006 Loron Estatutu Orgániku F-FDTL, Artigu 2 número 2 alinea a) to'o f).

⁴ Dekretu-lei Nú. /2006 Loron Estatutu Orgániku F-FDTL nian, Artigu 2 número 3

⁵ Republikasaun Lei Nú. 07/2006 28 Novembru (Lei Eleitoral ba Prezidencia Repúblika), Artigu 35 número 2

⁶ Republikasaun Lei Nú. 07/2006, 28 Dezembru (Lei Eleitoral ba Prezidencia Repúblika), Artigu 35 número 3

⁷ Republikasaun Lei Nú. 06/2006, 28 Dezembru (Lei Eleitoral ba Parlamentu Nasionál), Artigu 36 número 2.

⁸ Republikasaun Lei Nú. 06/2006, 28 Dezembru (Lei Eleitoral ba Parlamentu Nasionál), Artigu 36 número 3.

nian karik iha tumultu, agresaun ka violensia ne'ebé besik iha sentru votasaun⁹ maibe haruka sai forsa manutensaun orden públika nian wainhira la iha ona perturbasaun orden públika ba operasaun eleitoral nian.¹⁰

Iha âmbito seguransa ba eleisaun Prezidencia Repúblika no Parlamentu Nasionál nian prezensa F-FDTL hodi fo apoiu ba PNTL la iha akordu formal ruma maibe bazeia ba lei Seguransa Nasionál no Seguransa Interna ne'ebé fo biban ba F-FDTL atu halo intervensaun wainhira iha kazu esepsional ruma bele husu prezensa F-FDTL, la signifika F-FDTL hadau PNTL nia poder tuir konstituisaun haruka.¹¹ FM nia hare katak iha indikasaun F-FDTL bele foti PNTL nia papel iha âmbito seguransa interna nian, tamba la iha diretiva ruma ne'ebé konstitui F-FDTL nia papel iha eleisaun Prezidencia Repúblika no Parlamentu Nasionál husi Ministeriu Defeza no Seguransa.

FM duvidas makáas ba kontiudu regulamentu 04/STAE/X/2011 artigu 16 alinea e) ne'ebé husu prezensa forsa seguransa, sai hanesan preokupasaun ba FM tamba la iha justifikasaun ne'ebé klaru konabá prezensa forsa seguransa nian karik F-FDTL ka PNTL? Se prezensa forsa seguransa karik F-FDTL hanesan konstitui iha artigu 59 iha lei ne'e rasik, bandu ba prezensa F-FDTL nian iha sentru ka estasaun vota nian maibe la preojidika artigu 16 konabá manutensaun orden públika, FM kontinua duvidas tamba ho volume saida maka F-FDTL bele prezensa iha neba. Maske difini ona katak husu prezensa F-FDTL iha sentru votasaun karik iha tumultu, agresaun ka violensia maibe la iha justifikasaun definitivu ida.

FM kestiona ba artigu ida ne'e tamba FM hare katak nudar responsabilidade seguransa interna nian maka PNTL nudar hakerek iha Konstituisaun RDTL artigu 147 konabá Polísia no forsa ba seguransa ne'ebé Polísia defende legalidade demokrátika no garante sidadaun sira nia seguransa interna no prevensaun ba krime.¹² Ironiku liu tan Komando PNTL iha Unidade Especial Polisia (UEP) ho nia sub unidade tolu maka Bataliaun Orden Públika (BOP) Kompañia Segurasa Pesoad no Kompañia Operasaun Especial ne'ebé iha kapasidade espesial. Hanesan unidade rezerva ida wainhira hatan ba situasaun ruma ho sirkuntansia mantein no estabelese fila fali orden públika; rezolve no jere insidente krítiku; halo intervensaun ho táktika bainhira iha sitausaun ne'ebé iha violénsia, perigu, komplexu liu ka risku boot liu; halo seguransa ba instalasaun ne'ebé sensível no ba eventu boot sira, no protesaun ba entidade boot sira; Inativa eksplozivu sira.¹³

Regulamentu 04/STAE/X/2011 artigu 59 hatete bandu ba prezensa elementu F-FDTL hala'o nia servisu iha sentru ka estasaun votu nian maibe la preojidika artigu 16 alinea e) iha lei ne'e rasik no iha artigu 56 konabá manutensaun orden no disiplina liu-liu sekretariu estasaun votu nian no

⁹Regulamentu 04/STAE/X/2011, Artigu 16 alinea e).

¹⁰Regulamentu 04/STAE/X/2011, artigu 16 alinea f).

¹¹ Entrevista ho Nuno dos Santos. Xefe Departamentu Planeamentu Estratejiku Militar, Sekretaria Estadu Defeza. Kuarta, 15 Feveireiru 2012.

¹² Konstituisaun RDTL artigu 147, número 1) no 2).

¹³ Dekretu -Lei n.º 16/2009, laron 18 fulan Marsu, Lei Organika Polísia Nasionál Timor-Leste (PNTL), artigu 26 número 1 alinea a) to'o e.

ofisial eleitoral simu kuiñesementu nesesariu ba manutensaun orden no disiplina durante operasaun eleitoral hodi asegura liberdade votu no ninia regra servisu.

Nune'e mos artigu 60 konabá prezensa PNTL nian iha sentru votasaun no estasaun votu maibe dook husi metru 25 husi sentru no estasaun votu no la prejudika dispostu alinea e) artigu 16 no artigu 56 iha lei ne'e rasik.¹⁴ Karik iha kazu ruma ka aktu violensia sira, presidente sentru votasaun bele husu prezensa PNTL tama iha sentru ka estasaun votu nian.¹⁵

FM nia interpretaun iha artigu 56 ne'ebé artigu 59 número 1) no artigu 60 número 1) nia difinisaun indika ba artigu 56 ho sirkuntansia ne'ebé hanesan maibe la iha difinisaun klaru ba sirkuntansia ida ne'e. Ho aktu ida ne'e loke espasu ba elementu F-FDTL no PNTL duvidas ba nia intervensaun tamba iha artigu ne'e rasik fo biban ba elementu F-FDTL no PNTL hola medida hanesan, maske prezensa F-FDTL ba manutensaun orden públika hanesan forsa subsidaria ida, karik prezisa.

Iha ambitu seluk, Regulamentu 04/STAE/X/2011 konabá prosedementu ba votasaun, kontajen ba votu nian no apuramentu ba rezultadu eleisaun Prezidencia Repúblika no Parlamentu Nasionál nian artigu 57, número 3) bandu elementu F-FDTL no PNTL sai mata dalan ka uza arma wainhira elementu ida ezerse nia direitu votu nian. FM nia hare katak iha aplikasaun aritgu 57 lei ida ne'e nian sei iha kontradisaun entre lei no situasaun balu. FM kestiona konabá situasaun balu ne'ebé fo dalan atu uza arma nia hanesan, se iha sentru voatasaun balu, ne'ebé iha momentu neba elementu forsa seguransa nian ida deit iha sentru votasaun, oinsa bele garante seguransa ba arma ne'ebé elementu ne'e uza?

FM nia hare ho sirkuntansia rua ne'e bele fo dalan elementu hirak ne'e atu uza arma wainhira tama iha sentru votasaun atu ezerse nia direitu votu nian, maske iha artigu 57 número 3 bandu. Iha ámbito hanesan, FM nian hare katak Regulamentu 04/STAE/X/2011 konabá prosedementu ba votasaun, kontajen ba votu nian no apuramentu ba rezultadu eleisaun Prezidencia Repúblika no Parlamentu Nasionál nian seidak iha difinisaun ka justifikasaun ruma tuir sirkuntansia aplikasaun lei nian, wainhira akontese kazu ne'ebé konstitui iha leten.

2. Planu Operasional ba Eleisaun Prezidencia Repúblika no Parlamentu Nasionál, tinan 2012

Planu operacional ba Eleisaun Prezidencia Repúblika no Parlamentu Nasionál tinan 2012 iha parte VI número 2) konabá seguransa konabá preparasaun, simu no rai material, oinsa atu delibera material sensitivu ba armazen STAE prezisa iha aranzamentu seguransa husi PNTL no UNPOL.¹⁶ Maske nune'e la taka dalan ba F-FDTL iha sirkuntansia ruma, ne'ebé difini konabá fasilidade pakotementu no armanazenazen nivel distritu konabá preparasaun pakotementu material votasaun no kontazen nia iha nivel distritu no subdistritu, kordenasaun ho

¹⁴ Regulamentu 04/STAE/X/2011, artigu 60 número 1)

¹⁵ Regulamentu 04/STAE/X/2011, artigu 60 número 2)

¹⁶ Planu Operasional ba Eleisaun Prezidencia Repúblika no Parlamentu Nasionál tinan 2012, iha parte VI número 2) alinea b).

F-FDTL, se presiza F-FDTL.¹⁷ Iha ámbitu Planu Operasional ba Eleisaun Prezidencia Repúblika no Parlamentu Nasionál tinan 2012, FM nia análiza ba númeru 2) alinea i) la iha justifikasaun konabá kordenasaun ho F-FDTL ba aranzamentu seguransa hodi asegura material sensetivu ba armazen STAE, karik iha situasaun saida mak F-FDTL bele prezensa iha neba?

Maske nune'e, atu realiza movimentu STAE nian presiza hetan assistensia husi UNMIT. Liu husi kordenasaun ho administrasaun UNMIT, lojstika, PNTL/UNPOL no F-FDTL hodi asegura meius sira ne'ebé presiza ba movimentus referidu.¹⁸ Nune'e mos, Kada sentru votasaun sei iha ninia seguransa rasik tuir nesidade no risku tuir asesimentu PNTL no UNPOL. Sei labele lori arma tama iha estasaun votasaun. Exeptu, wainhira Presidente sentru Votasaun husu atu halo intervensaun husi membru PNTL ou UNPOL se iha ema ruma ne'ebé interompe prosesu votasaun no kontazen.¹⁹ FM nia hare iha ámbitu seguransa iha sentru votasaun nian, justifika ona katak intervensaun iha sentru votasaun maka PNTL no UNPOL wainhira ema ruma interompe prosesu votasaun no kontazen, ne'e sorin ida.

Iha sorin seluk, konabá suspensaun ba votasaun, presidente sentru votasaun bele diside hapara votasaun wainhira iha ameasa violensia ka buat ruma ne'ebé interompe orden votasaun ka ameasa ofisial nia vida, votantes ka ema ruma iha estasaun votasaun ka iha ameasa ba seguransa urnas nian.²⁰ Iha sirkuntansia ida ne'e presidente sentru votasaun tenki hato'o imediatu ba kordenador STAE distrital, karik labele halo komunikasaun maka tenki husu assistensia husi PNTL ka UNPOL ka F-FDTL ka ISF.²¹

FM kestiona nafatin konabá intervensaun F-FDTL nian iha sentru votasaun, seidak iha difinisaun wainhira maka F-FDTL fo assistensia karik iha aktu ruma ka ema ruma interompe orden votasaun nian. Tamba iha planu ne'e rasik, Parte VII númeru 3) seguransa iha sentru votasaun fo biban PNTL ka UNPOL maka bele halo intervensaun, la defini konabá intervensaun F-FDTL nian iha sentru votasaun.

Iha públikasaun Jornal Diariu Nasionál Segunda 13 Feveiru 2012, Komadante PNTL Komisariu Longuinhos Monteiro hatete forsa PNTL koperasaun ho F-FDTL iha ámbitu seguransa ba eleisaun jeral, F-FDTL koloka ona postu iha distritu Ermera, Ainaro, Manufahi no postu permanente rua iha Bobonaro inklui Suai hodi apoiu seguransa ba eleisaun jeral 2012.²² Maske F-FDTL koloka ona postu sira iha distritu hodi fo apoiu ba PNTL iha ámbitu seguransa ba eleisaun jeral, maibe preokupasaun ida mak la iha diretiva ruma ne'ebé husu prezensa F-FDTL iha sirkuntansia saida maka F-FDTL bele halo intervensaun no prezensa F-FDTL to'o

¹⁷ Planu Operasional ba Eleisaun Prezidencia Repúblika no Parlamentu Nasionál tinan 2012, iha parte VI númeru 2) alinea i).

¹⁸ Planu Operasional ba Eleisaun Prezidencia Repúblika no Parlamentu Nasionál tinan 2012, iha parte VI númeru 3) alinea e)

¹⁹ Planu Operasional ba Eleisaun Prezidencia Repúblika no Parlamentu Nasionál tinan 2012, Parte VII Operasaun Votasaun, númeru 3).

²⁰ Planu Operasional ba Eleisaun Prezidencia Repúblika no Parlamentu Nasionál tinan 2012, Parte VII Operasaun Votasaun, númeru 4) alinea 1).

²¹ Planu Operasional ba Eleisaun Prezidencia Repúblika no Parlamentu Nasionál tinan 2012, Parte VII Operasaun Votasaun, númeru 4) alinea 3).

²² Jornal Diariu Nasionál. Segunda 13 Feveiru 2012

loron hira, no parte Sekretaria Estadu Defeza rekuza prezensa F-FDTL iha distritu atu fo apoiu ba PNTL konabá seguransa eleisaun jeral nian, maibe prezensa F-FDTL halo deit misaun komponente enjeneria atu apoiu servisu hanesan halo eskola no servisu seluk ne'ebé F-FDTL prezisa halo, ne'e sorin ida.²³

Iha sorin seluk, iha ona Sentru Integradu halo Jestaun ba Krize ida ne'ebé tutela ba Gabinetu Premiru Ministru hanesan sentru operacional ida hodi responde ba situasaun emerjensia ruma ho nia funsionamentu atu hasai ninia notifikasaun ba Konsellu Ministru hodi hasai rezolusaun ruma atu atua situasaun emerjensia sira. Maibe ninia funsionamentu to'o agora seidak funsiona atu fasilita servisu hamutuk entre polisia no militar hodi forma seguransa nasional maibe durante ne'e iha deit enkontru informal sira hodi fasilita kordenasaun servisu hamutuk entre institusaun polisial no militar ba situasaun emerjensia ruma.²⁴

Iha sirkuntansia ida ne'e, FM hakarak kompara situasaun rua iha prosesu eleitoral tinan 2001 no 2002 Timor-Leste hala'o eleisaun iha UNTAET nia autoridade nia okos ba eleisaun Prezidencia Repúblika no ba Assembleia Konstituante, ne'ebé tuir mai sai Parlamentu Nasionál (PN) iha ámbitu segurasan ba eleisaun nian, tinan 2001 no 2002 seguransa responsabiliza husi misaun UNTAET nian pratikamente UNPOL mak asegura seguransa ba eleisaun. Iha tinan 2007, primeira vêz hala'o eleisaun jeral ba Prezidencia Repúblika no Parlamentu Nasionál depois restarasaun independensia Timor-Leste, PNTL tenki simu responsabilidade atu fo seguransa ba prosesu eleitoral tuir konstituisaun haruka nudar responsabilidade seguransa interna nian.

Tinan 2012 Eleisaun Prezidencia Repúblika no Parlamentu Nasionál nudar segundu eleisaun jeral iha independensia Timor-Leste. FM hare ba prosesu eleitoral iha tinan 2007, PNTL iha kapasidade naton atu responde ba situasaun hotu maske iha momentu neba iha situasaun balu prova kapasidade operacional instituisaun PNTL maibe PNTL konsege garante tranquilidad pública ba prosesu eleitoral. FM kestiona nafatin katak iha ameasa saida maka prezisa intervensaun F-FDTL iha eleisaun jeral 2012? Karik la iha konfiansa ba instituisaun PNTL atu responde ba situasaun ruma?

Konkluzan

FM konklui nia análise bazeia ba kuadru nasional ne'ebé fo espasu ba F-FDTL bele hola nia papel iha eleisaun Prezidencia Repúblika no Parlamentu Nasionál katak seidak iha definisaun lolos husi lei ne'ebé konstitui F-FDTL nia papel. Tamba la iha indikasaun lolos ba medidas F-FDTL nian iha loron eleisaun nian no depois eleisaun.

Nune'e mos iha lei eleisaun prezidencia repúblika, parlamentu nasional, regulamentu STAE no planu operacional. Iha sirkuntansia balu, jeralmente F-FDTL bele hola papel iha eleisaun katak prezensa F-FDTL nudar autor seguransa rezervadu ida, F-FDTL nia prezensa wainhira iha

²³ Entrevista ho Nuno dos Santos. Xefe Departamentu Planeamentu Estratejiku Militar, Sekretaria Estadu Defeza. Kuarta, 15 Feveireiru 2012.

²⁴ Entrevista ho Nuno dos Santos. Xefe Departamentu Planeamentu Estratejiku Militar, Sekretaria Estadu Defeza. Kuarta, 15 Feveireiru 2012.

sirkuntansia ne'ebé ameasa boot, agresaun ruma ka violensia ne'ebé impede prosesu eleitoral ka perturbe orden eleitoral nian atu halo manutensaun orden públika nian, maske nune'e la preojidika ba nia direitu votu nian.

Maibe la iha justifikasaun ba limitasaun intervensaun F-FDTL nian iha sirkuntansia sira ne'ebé tama iha F-FDTL nian responsabilidade atu asegura prosesu eleisaun. FM sita ba Xefe Estadu Maior Jeneral F-FDTL Major Jeneral Lere Anan Timur nia diskursu iha aniversariu transformasaun forsa girilia ba forsa konvensional (FALINTIL ba F-FDTL) katak F-FDTL hatete katak lider sira labele uza forsa nar-naran deit tamba misaun F-FDTL no PNTL diferente. Pratikamente iha eleisaun propriu F-FDTL presiza diretiva ida atu nune'e F-FDTL bele hatene servisu saida maka F-FDTL halo no servisu ne'e to'o iha ne'ebé ka limitasaun ba F-FDTL.²⁵

Maske lei ne'e iha ona prosesu implementasaun maibe presiza difini lolos knaár F-FDTL nian atu nune'e bele asegura knaár F-FDTL nian durante prosesu eleisaun nian, ne'e sorin ida. Iha sorin seluk, presiza difini lolos atu nune'e hadook F-FDTL husi politiku sira nia konsumu durante kampañia eleitoral, tamba bele mosu interpretasaun politika ba knaár F-FDTL nian iha ámbitu seguransa interna, ne'ebé tuir lolos knaár ne'e konstitui ba PNTL nian responsabilidade.

Rekomendasaun

Rekomendasaun FM nian ba relatoriu ne'e maka tuir mai ne'e:

1. Ba Ministeriu Defeza no Seguransa, pratikamente Sekretariu Estadu Defeza presiza hare fila fali knáar F-FDTL nian iha ambitu intervensaun F-FDTL iha seguransa interna nian.
2. Sekretariu Estadu Defeza kordena ho STAE konabá kordenasaun nian ba planu operacional antes loron votasaun, durante votasaun no depois votasaun.
3. STAE presiza hare fila fali lei no regulamentu sira ne'ebé fo biban ba F-FDTL halo nia intervensaun hodi nune'e antisipa aktu sira ne'ebé la'os F-FDTL nian responsabilidade. Maske lei ne'e iha ona implementasaun maibe presiza hare fila fali iha eleisaun tuir mai.
4. STAE tenki hare fila fali Regulamentu Nú. 04/STAE/X/2011 artigu 16 alinea e) no f), ne'ebé justifika lolos intervensaun F-FDTL nian iha sentru votasaun, karik F-FDTL ka PNTL.
5. STAE tenki justifika lolos knáar F-FDTL nian ba F-FDTL ne'ebé iha Regulamentu Nú. 04/STAE/X/2011 artigu 59 número 1) no artigu 60 número 1) hatur knáar F-FDTL no PNTL ne'ebé la iha diferente nudar konstitui husi artgiu 56 Regulamentu Nú. 04/STAE/X/2011.
6. Rekomenda ba PNTL no UNPOL hametin nivel kordenasaun operacional nian atu asegura prosesu eleitoral tomak durante kampañia eleitoral to'o eleisau ramata.

²⁵ Diskursu Xefe Estadu Maior Jeneral F-FDTL Major Jeneral Lere Anan Timur, iha Sentru Konvensaun Dili, Loron Transformasaun Força Girilia ba Força Convencional (FALINTIL ba F-FDTL). Kinta, 02 Feveiru 2012

Referensia:

Lei sira

Konstituissaun Repúblika Demokrátika Timor-Leste

Dekretu-lei Nú. /2006 Loron Estatutu Orgánika F-FDTL nian.

Dekretu-Lei Nú. 16/2009, lron 18 fulan Marsu, Lei Organika Polísia Nasionál Timor-Leste (PNTL).

Republikasaun Lei Nú. 07/2006, 28 Dezembru (Lei Eleitoral ba Prezidencia Repúblika).

Republikasaun Lei Nú. 06/2006, 28 Dezembru (Lei Eleitoral ba Parlamentu Nasionál).

Lei Seguransa Nasionál 02/2010.

Lei Seguransa Interna 04/2010.

Regulamentu 04/STAE/X/2011

Planu Operasional STAE ba Eleisaun Prezidencia Repúblika no Parlamentu Nasionál 2012

Intervista

Intervista ho Nuno dos Santos. Xefe Departamentu Planeamentu Estratejiku Militar, Sekretaria Estadu Defeza. Kuarta, 15 Feveiru 2012.

Jornal

Jornal Diariu Nasionál Segunda 13 Feveiru 2012

Fontes Seluk

Diskursu Xefe Estadu Maior Jeneral F-FDTL Major Jeneral Lere Anan Timur, iha Sentru Konvensaun Dili, Loron Transformasaun Forsa Girilia ba Forsa Konvensional (FALINTIL ba F-FDTL). Kinta, 02 Feveiru 2012.